

欽定剿平粵匪方略

欽定勦平粵匪方略卷四十九 癸丑年

七月初七日

庚戌

訥爾經額奏言伏查總兵董占

元等二十一日之戰雖損折兵將第該鎮等身
先士卒將頭道賊寨攻破並殲斃賊匪多名實
屬奮勇出力如果各路官軍俱能如該鎮等之
衝鋒陷陣何難痛加勦洗臣因其遷延不進曾
經奏叅奉

旨摘去頂戴交部議處今該鎮銳志前敵若仍予嚴議
無以服諸將之心可否邀

恩寬其處分俾得感益思奮至懷慶被圍已久分攻則
彼能力抵合剿則我占全勢臣深恐諸路進兵
參差不一昨經密囑恩華托明阿李德勝保率
同將領各員往返會商約定時刻各任一面四
路齊進或設奇抄襲或合力兜擊互相策應使

賊兼顧不暇得以肅清逆燄迅解重圍仰紆

聖廬奏入

上諭曰董占元甚屬奮勇著從寬免議責令卽行前進
攻破賊壘盡掃妖氛以解重圍訥爾經額亦應趕緊
前往督勦

訥爾經額又奏言接准尙書恩華咨稱六月二
十七日卯刻督帶吉林黑龍江直隸山東各處

官兵由二十里鋪直抵丹河各路官兵奮勇過
河賊衆紛紛走避官兵乘勢掩殺轟斃賊百餘
人吉林馬隊直逼逆匪新築木城賊匪退入潛
於木城內施放槍礮隨飭火器營官兵施放火
箭並令巡捕營吉林直隸督標等官兵放火燒
燬賊占民房百數十間並於樹林及高粱地搜
殺賊匪五六十人二十九三十等日逆匪復向

丹河南面探渡當卽親督各路官兵施放大礮
過河掩殺該逆仍退入木城不出查賊匪所築
木城堅厚城外濠溝數道驟難攻拔現在相機
籌畫設法勦辦

同日李億奏言查懷慶城外四面賊巢各鎮所
帶官兵統計祇二千數百名爲數本已無多自
前月二十一日董占元潰傷後兵心益形惶怯

集賢堂
三
至黑龍江官兵向稱勁旅近則見賊卽走更易
誤事此臣與恩華蘊秀所親見者臣祇一千八
百兵勇而欲當七八千逆賊未便冒險輕舉若
非厚集勁兵斷難破其巢穴相應仰懇

天恩俯准將駐守廟工之直隸藩司張集馨所帶官兵
駐守輝縣之長蘆運司楊需所帶兵勇並在直
隸之山西官兵共挑三四千名迅速前來並請

飭下訥爾經額派委得力將弁統帶再西安鎮總兵郝光甲現帶陝甘兵二千名前赴澤州防堵如來豫夾攻道路便捷伏乞

諭令該總兵郝光甲趲程前來會合剿辦均奏入

上命軍機大臣傳諭訥爾經額曰據奏函囑恩華托明阿勝保李德定期四路齊進以期速解懷慶之圍必應如此辦理惟該大臣駐紮衛輝距各路軍營較遠

尙恐咨稟稽延仍有鞭長莫及之勢著卽相機前進
就近督勦李德所請張集馨楊需所帶之兵及山西
官兵並著酌量緩急以資策應除懷慶之賊匪始可
固直隸之藩籬該大臣諒能仰體朕意也訥爾經額
以大學士督師勦賊斷難任賊猖狂滅賊惟汝之功
縱賊卽汝之罪卿豈不知耶

上又命軍機大臣傳諭李德曰逆匪分踞懷慶城外不



明阿勝保等六月二十五六七等日與賊接仗先後
擒斬二三千名何以該撫奏報尙未敘及豈因丹沁
二河之隔彼此軍營竟不相聞問耶本日已諭令訥
爾經額督兵前進並令舒興阿督催郝光甲帶兵二
千趕赴懷慶郝光甲如已趕到並烏勒欣泰之兵該
撫均可就近調撥至所請張集馨楊需並山西官兵
並著與訥爾經額酌量緩急以資援剿

上又命軍機大臣傳諭舒興阿曰總兵郝光甲所帶官兵二千名前經該撫奏稱由山西取道前赴太行要隘防剿著卽催令速赴懷慶會同各路官兵攻剿賊匪迅解郡城之圍毋稍延誤

同日雷以誠奏言六月二十二日該匪於缺口門縫下數百人過河直撲千總孫得富率領壯勇直前堵擊臣當派直隸州知州陳錫麟等飛

往接應槍斃賊匪三十餘人二十四日又有賊
下城在城濠支搭浮橋似有縋城撲營之狀卽
派勇三百餘名飭令知縣師榮光監生陳寶齡
沈方煦等管帶前赴揚城東北隅暗地施放火
箭風狂火烈將所搭浮橋並城上板屋頃刻燒
燬賊果驚擾不敢出城復於途次經該員等在
蘆葦中搜獲奸細二名一名王連魁又一名林

泳年係賊中僞丞相均卽訊明梟示二十七日
賊忽於城上用輓梯四路下城約計一千餘人
勢甚兇很臣派孫得富等率勇奮擊賊衆敗退
二十九日千總孫得富又敗賊於徐凝門斃匪
五十餘人受傷者不計其數賊匪屢次大敗不
敢再竄奏入

上命軍機大臣傳諭琦善陳金綬雷以誠福濟曰揚州

賊匪連次縋城而下支搭浮橋撲我軍營均經雷以誠等派員督帶兵勇擊退擒獲多名並擒僞丞相林泳年一名當卽梟示惟賊匪旣圖竄出則防堵尤必加嚴著琦善陳金綬會同雷以誠福濟乘其潛圖竄逸之時豫設伏兵以爲掩襲之計慧成容照所帶官兵如已趕到卽可擇要調撥

同日江南道監察御史黃經奏言逆匪久竄金

陵鎮揚我兵分投攻勦數月以來未能克復皆
因賊船占踞江面恣意往來互相犄角是以官
兵轉形跋扈若非整備舟師掃清江面使賊南
北截然則攻擊殊難下手查川楚皖省皆金陵
上游勢若建瓴宜

命各該督撫速備船隻聽用卽於現在各路官兵酌撥
若干遴選熟習水師將弁分起統帶乘此秋令

西風迅利自襄漢皖江各處駕船順流東下直
抵金陵仍知會下游水艇沂江而上合力會擣
江面旣清賊勢南北隔絕自不能互相救應琦
善等迅復揚州移師會勦各去猜忌之見協力
同心金陵乃可剋期收復鎮江亦可次第攻取
惟一應師船若待鳩工製造誠恐緩不濟急應
請

飭下各該督撫體察情形辦理奏入

上命軍機大臣傳諭張亮基崇綸駱秉章曰據御史黃經奏稱賊船占踞江面必須上游速備船隻酌撥將弁與向榮水陸合剿所奏自係目前緊要機宜著張亮基崇綸駱秉章等卽於各路水師船隻酌量調撥或設法雇備民船多隻配帶礮位揀派得力將弁管駕自上游駛赴金陵與陸路官兵合力攻剿並與下

游艇船兩路合剿方可肅清江面掃盡賊蹤

初八日辛亥兵部侍郎銜周天爵刑部侍郎奕經

奏言淮河南撫臣咨會賊有東下之謠臣等會

晤熟商以徐州居江皖東豫四省之中江揚兩

路之賊設因剿急北竄此地最當其衝臣等會

勘於城南泰山東西兩口添築礮牆將大同兵

九百餘名除酌留看守王家山瞭望礮臺外其

餘悉數調防該處將熱河兵六百名仍駐九里溝密雲兵四百餘名調至雞嘴壩駐紮以爲三山頭梁山口之鎖鑰其雲龍山爲徐城南面障蔽卽將臧紆青所帶之勇一千五百名屯紮至徐州府駐有糧臺附近上游土匪必須隨起隨剿旣免其沿途延蔓卽可以兼顧下游宿遷留護糧臺有山西兵共一千一百餘名應卽令藩

司陳啟邁就近統帶並督率縣營號召義勇或
於河兵中揀調壯健者一千名先行擇要扼守
以壯聲威臣周天爵現仍督帶山東兵一千餘
名前赴固鎮布置緣該處在徐宿之南如賊自
江浦六合五河分竄爲徐宿計必先自固鎮始
非全力畢注於此實無把握卽他處有警亦不
可調至災民中如有材技可用者當量爲招募

並先行派委幹練之員訪察辦理固不可使流而爲匪亦不敢輕率濫收徒糜餉項奏入

上命軍機大臣傳諭周天爵奕經曰現在大同兵調紮泰山東西兩口熱河兵留紮九里溝密雲兵調紮雞嘴壩減紆青所帶練勇留紮雲龍山其宿遷糧臺已有山西兵一千餘名並號召團勇揀調河兵擇要扼守所籌均尙周妥惟所稱固鎮留防之山東兵不得

調往他處自係爲該處緊要起見如果遠處徵調誠恐徐宿兵單儻附近一帶或有土匪竊發或滁鳳等處探有南來賊蹤仍當迅速撥往剿捕豈可再蹈前轍致令逆匪北竄至招募災民一節原以弭患未形該侍郎等所稱先行訪察以防濫收似亦見及募勇之不可深恃從前周天爵召募之勇多有不遵約束臨時遣散其遣散之後並未聞收繳軍械亦未聞妥

爲安插朕聞河南之賊卽有此輩散勇溷跡其中是
召募不慎非但無益且貽後患現在餉款籌畫甚艱
該侍郎等亦所深悉亟應慎之於始無任徒糜帑項
也

初九日 壬子 琦善陳金綬雷以誠福濟奏言近日

連獲奸細僉供瓜州賊匪欲糾鎮江之賊前來
接應當經分飭鎮將晝夜嚴防七月初一日果

有賊船數百隻由瓜州駛入運河直抵三汊河
爲河內木椿所阻都司毛三元等施放大礮賊
船退卻賊衆復役衆挑土起築礮臺用大礮向
北轟擊該處另有河汊係往儀徵之水路該匪
沿河西行約五里許盡行登岸約有七千餘人
搭橋結筏分股渡河我兵用槍礮擊斃無算賊
猶抵死搶渡適侍衛德興阿縱馬前擊賊始少

卻俄頃復進瞿騰龍會同德興阿督率滿漢將
領奮勇迎敵參領博奇海全首先射斃賊匪多
名遊擊安勇都司鄧鳳林余兆吉均各督兵力
戰賊去復來者五次官兵酣戰竟日冒雨攻撲
賊不能支紛紛敗退是日有另股賊匪由瓜州
至洞清鋪河邊搭橋紮筏德興阿卽派參領富
明阿富勒布馳往副將松齡錫綸亦派都司吳

車龍等帶兵截擊富明阿殺賊數十名以力戰受傷吳車龍殲斃賊匪多名其時三汊河之東桂花莊地方有賊在彼牽牛煮飯臣雷以誠派張翊國張得龍等馳至該處擊斃多名現在各門均已有人扼守惟鈔關徐凝二門稍覺空虛由臣雷以誠會同臣福濟派員巡查初三日臣雷以誠復派同知吳雲等率勇二百名至徐凝

門堵勦施放火箭焚城內板屋數間賊匪縋城而下由浮橋渡至運河東岸該員等督勇迎擊賊始退入城內臣等惟有合力勦擒以期早殲醜類

琦善陳金綬雷以誠福濟又奏言據派防浦口總兵武慶稟稱六月二十八日辰刻探得浦口寶塔根地方有賊匪大船二隻小船四隻駛來

傍岸武慶卽率領遊擊王巨孝督帶官兵駛往
該處迎頭堵截用火箭槍礮將賊船全行燒燬
該處防堵尙屬認真臣琦善現仍分飭武慶開
隆阿西昌阿伊興額等督率官兵實力防禦一
遇賊船傍岸立卽會合攻擊奏入

上命軍機大臣傳諭琦善陳金綬雷以誠福濟曰瓜州
賊匪欲糾鎮城之賊與揚城接應經該大臣等分飭

鎮將晝夜嚴防合力圍攻並由雷以誠福濟各派兵
勇分路進剿均獲全勝揚城瓜州之賊以三汊河爲
通津要路我兵扼守斷其往來今旣疊獲勝仗是賊
匪已大受懲創惟江湖方長難保不糾衆復來不可
不嚴加防禦著琦善陳金綬會同雷以誠福濟等分
飭鎮將乘勝夾攻其黑龍江及河州湖南得力之兵
尤須調度得宜總期迅復揚城則鎮江金陵亦可以

次克復惟進攻不可稍懈分竄尤宜嚴防鈔關徐凝
二門旣稍覺空虛卽於各營官兵內酌量調撥互爲
聲援總宜四面環攻令賊匪無路可竄方可聚而殲
旃至浦口賊船經武慶等擊退尤應時加防範不可
稍有疏失

同日陸應穀奏言六月十九日逆賊由羅山縣
西南一帶逃竄二十日至綱莊該縣雷元帶領

兵勇趕至擊斃賊匪多名賊卽竄至龍旺宣化等鎮二十四日至大勝關已竄湖北地界王家琳帶兵跟蹤追入楚境據湖北咨會應山一帶已派前藩司唐樹義督帶兵勇阻截此股敗竄零匪長髮者僅二三百人不難盡數殲除惟汴省東南一路太覺空虛而歸德一府距省甚近且爲北方門戶臣不能不趕緊折回豫爲籌畫

奏八

上命軍機大臣傳諭陸應穀曰逆賊自攻撲懷慶後其
零股餘賊由汝甯一帶轉竄而南朕早知其必趨楚
境茲據陸應穀奏該逆果由羅山縣屬之宣化鎮渡
河竄入湖北地界總兵王家琳已跟蹤往剿此股零
匪雖已無多但恐沿途裹脅又成滋蔓不得以已入
楚境遂置之不問僅委王家琳一員追剿實難保其

必能得力該撫旣折回省城所有歸德陳州等處偏
近省垣布置誠不容緩而南路遺孽仍須速派幹員
與湖北所派帶兵大員會合兜剿以淨根株

初十日癸丑
訥爾經額奏言查賊竄懷慶將及市

月各路官軍雲集連日攻剿甚緊副都統松玉
前任總兵德坤均歸前河督文冲統帶前往會
剿文冲曾任河北道懷慶一帶地方本所熟悉

現在附近懷慶之武陟溫孟等縣均有團練自衛鄉里文冲此時帶兵到彼就近勸諭可期踴躍樂從臣前擬臨洛關駐紮之

盛京吉林馬步隊兵共四千名係由水路至大名起旱此時尙未到防臣思臨洛關尙距懷慶賊營六百餘里應俟此項官兵行抵大名後撥二千名乘坐原船由衛河徑來衛輝留於大營隨

時調遣其餘二千名以一千名撥赴榮澤渡口
一帶屯駐以一千名交署藩司張集馨在廟工
蘭儀渡等處分布

同日勝保奏言臣於二十八日起連日進兵攻
勦賊俱堅匿不出伏思逆匪四面圍城非得攻
破營壘使內外聲息相通不能解郡城危急臣
因定於七月初三日進兵復豫期約會托明阿

善祿等攻賊東面李億董占元攻賊北面臣是日寅刻出隊親督兵勇直撲南門賊營該逆分三股由賊營後抄來臣亦分三路擊殺兵勇奮力爭先立斃賊匪三百餘名賊卽匿入木城臣督令兵勇隨勦隨進城上川勇及天津兵丁亦由城隄下直撲賊營後面該逆登時大亂分五股抄擊我兵勇亦奮勇撲入以期內外聲勢相

應無如城上所選兵丁壯勇擡礮擡槍俱未繫
下而逆賊槍礮甚多以致陳得魁等陣亡該逆
見兵勇受傷遂更分股撲出臣督令天津正定
固原將弁催兵前進川勇頭目龐玉等亦奮力
相援始將賊匪擊退殺死七百餘名該逆騎馬
頭目八十餘人由西面賊營飛奔而來欲抄我
兵後路經遊擊吳燦率領擡槍兵丁及黑龍江

馬隊烏凌額魁福等立將該賊目等盡行殲斃
生擒十四名臣得力兵勇僅有此數若令直偪
城下萬一爲賊抄裹在內反恐貪功致敗祇得
暫傳收隊再行設法勦辦

勝保又奏言臣兵僅一千六百名不能分防要
隘有西安副都統雙成統帶馬隊官兵五百名
到懷臣因托明阿等兵力較厚與之會商酌撥

涼州步隊官兵六百五十名會同馬隊官兵移紮府城南沙岡一帶既可斷其接濟之路兼可防其竄逸近日各路官兵雖厚而實在與賊接仗者不多卽如北路距賊甚遠進戰時隔河施放槍礮賊亦不甚介意西路現在無兵托明阿等東路尙能爲臣應援而其官兵亦多不能前進臣自恨兵力單薄出隊之兵僅七百餘名不

能分路出奇夾攻制勝各路之兵雖多皆有統帶大員事權不一未能和衷共濟均奏入

上命軍機大臣傳諭訥爾經額恩華托明阿勝保李德
曰逆匪竄圍懷慶卅月以來各路官兵雖有斬獲而
賊巢未破城圍未解該大臣等所擬布置尙屬周妥
均著照議辦理惟軍情緩急仍須隨時酌度不可以
有用之兵置之無用之地至勝保所陳兵力單薄不

能分路出奇自係實在情形副都統雙成帶領馬隊
五百名業經至勝保軍營分撥駐紮其防守柳園口
之遊擊吳璋帶兵三百名並著訥爾經額飭令迅赴
勝保軍營俾資攻剿仍另派弁兵前往柳園口接替
現在各路兵力不爲不厚恩華李德及董占元等駐
紮北路去賊尙遠若止隔河施放槍礮徒糜火藥何
能有濟現聞懷慶北面賊營林立著恩華等拔營前

進倨近賊巢方能與托明阿勝保等分路夾攻聯爲
一氣現在勝保兵力甚單距賊甚近恩華所帶官兵
卽著酌量分撥若干名派員帶往勝保軍營協剿李
德越境剿賊利在速戰並著會同統兵各員將懷慶
賊匪剋期進剿一俟該郡解圍卽可折回山東辦理
地方事宜

同日太常寺卿王履謙河東河道總督長臻奏

言查上游各渡口原派有彰德衛輝兩府官兵
在彼守禦經撫臣陸應穀並總兵花里雅遜布
撤回防勦其餘所調各兵非赴豫會勦卽防守
要隘斷難再行抽調惟慧成帶兵自南省來應
請

旨催令兼程來豫會防河岸庶藉兵力以遏賊蹤臣長
臻帶領河標兵二百名會同臣王履謙在武陟

縣上下各河口嚴密巡查所有前調山西大同
營兵二百名卽安置木欒店防堵仍密派隨營
委員等帶領兵勇按日分起巡哨昨探聞歸德
府並南汝一帶土匪滋擾約有數千永城縣境
嘯聚尤多相應請

旨飭派大員帶兵前往歸德等府扼要防剿並請

飭下河南撫臣一體嚴密堵禦不使南路賊匪再有勾

結奏八

上命軍機大臣傳諭王履謙長臻曰前已有旨令慧成
仍回清江浦駐紮現在懷慶城外賊匪尙未撲滅歸
德一帶又有匪徒嘯聚乘機勾結著王履謙長臻卽
督率兵勇於黃河上下游嚴密巡防盡收船隻斷不
可令該匪南北聲息相通再致勾結遊擊吳璋帶兵
三百名現經勝保調赴軍營所有柳園口防堵事宜

已諭令訥爾經額迅派弁兵接替

同日李嘉端奏言 臣接據各路探報初十日有賊船十餘隻自金陵駛至三山磯十八日全過懷甯在雍家鎮掠去鹽船數隻並繁昌縣三山地方存倉漕米亦被搶去連日東北風尤猛據探小孤山一帶賊船被風擊沈二十餘隻餘俱乘風竄駛復於七月初一初二等日准兩湖總

督咨稱黃河以南之賊於六月十八日未刻攻陷羅山縣城次日竄往陡溝拆屋紮簿似有順淮東下之意又稱二十六日賊由仙花鎮東竄黃安恐由陸路竄安境等語查安省衝要口隘一在東西梁山爲江面要路一在關山爲北竄要路一在正陽關爲沿淮回竄要路臣前擬鑄礮調船在梁山設守復遣前臬司張熙宇赴安

慶查辦撫恤一面履勘伏兵處所期與梁山守
兵上下接應並飭六安州於所募壯勇內精選
備用今黃安賊匪有由旱路竄逸之信則六安
之勇應令留保本境現飭知縣黃元吉前往西
梁山練募水勇以防江面其正陽關一帶已飛
咨侍郎周天爵總兵玉山並分飭各屬於界連
處所嚴密截剿至關山一路應令勝保遣回之

西安馬兵及改撥之山東兵駐守相應請

旨飭令勝保查明催令迅赴安徽以資防剿奏入

上命軍機大臣傳諭李嘉端曰水陸賊船自金陵竄出沿江搶掠河南旱路之賊攻陷羅山後拆屋紮籐意欲順淮東下又由仙花鎮東竄黃安逼近皖境該省水陸各要隘亟宜嚴密堵截著李嘉端卽與周天爵咨商抽調並督同總兵玉山扼要布置毋令賊匪勾

結爲患西安馬隊官兵現經勝保留於懷慶勢難赴
皖已有旨命慧成帶兵折回以防賊匪北竄據琦善
覆奏擬撥安徽要隘等處防剿卽著該撫咨商辦理
上又命軍機大臣傳諭向榮許乃釗曰近日江面未能
肅清陸路官兵亦難得力向榮初到江南卽欲在上
游準備礮船順流而下後因湖北旣未能備辦盧應
翔所帶之船亦不得力旋即撤去現在下游雖有艇

船而瞬屆西風司令更恐上溯爲難昨諭湖廣督撫酌量調撥師船或設法雇備民船配帶礮位派員管駕自上游駛赴金陵以資攻剿向榮於湖廣情形素爲熟悉應用何項船隻可以得力並需用兵勇多寡槍礮軍械何項適用著體察情形迅卽咨商張亮基等妥籌辦理如該大臣營中有堪帶水師之員卽派往湖北統帶遄行總期兵力足資剿辦卽可與下游

艇船併力夾攻廓清江面至金陵鎮江兩城仍當迅
圖克復不得因籌調船礮株守坐待致誤事機

欽定勦平粵匪方略卷五十 癸丑年

七月十一日

甲寅

張芾奏言伏思該逆慣用地雷

攻城勢甚危險而得勝門未燬民房尙多該逆
伏踞偷窰地道防不勝防非厚集兵力誠恐倉
卒轟裂措手不及當經臣商之陳孚恩江忠源
密將所派游兵練勇及分守永和順化進賢惠
民等門之楚勇約計千名並浙江擡槍兵調集

該處晝夜嚴防凡遇打仗不令出隊以免墮賊
奸計尤恐該逆數穴同時並發飭令帶勇各弁
分段守禦不得顧此失彼正在督催趕辦閒六
月二十三日寅刻該逆於前次轟塌城垣缺口
之西復用地雷轟塌城身四丈有餘賊衆蟻擁
而至適江忠源之弟職員江忠濟巡城至得勝
門與已革總兵清保首先督同楚勇將賊擊退

正欲乘勝壓下右邊相連處復轟塌五丈有餘
共塌九丈有餘轟傷弁勇多名江忠濟見勢危
急持刀督勇向前誓不獨存甫至缺口該逆又
將大火藥包向內拋擲燒傷楚勇數十名賊目
手執黃旗乘勢上城江忠濟等奮力迎擊將賊
目登時殺斃衆勇一齊趕上賊始敗退當搶護
危急之際該逆又於舊缺口之東用地雷轟塌

城身六丈有餘幸守備李輔朝等豫先布置雖
西邊勢甚危急未敢稍違節制擅離半步於黑
燄上騰後卽行堵住缺口該逆用大火藥包拋
擲勇目戴利行夏春潮及衆勇丁均各受傷已
革遊擊長春與都司景星衛千總張繼成督令
兵勇幫同抵禦督糧道鄧仁堃等帶領練勇躬
冒矢石合力將賊殺退江忠源復馳赴救援兵

勇更覺用命適臣甫由得勝門赴永和門中途
聞警折回督飭在城文武員弁各帶兵勇夫役
搬運輓石趕緊搶築竭一日之力一律高與城
齊復令總兵馬濟美統帶兵勇自永和門外營
盤出隊由東而北又令都司戴文蘭已革副將
張金甲各帶兵勇自章江門外營盤出隊由西
而北兩路夾擊以分賊勢賊衆伏匿不出從牆

內放礮抗拒我兵屢次攻撲適值大雨槍礮難施西路兵勇進攻文孝廟賊壘賊衆突出數百人都司戴文蘭奮不顧身帶勇迎擊賊退入廟殺賊二十餘名是役也該逆用地雷三處同時並發轟塌城牆共二十五丈有餘較前尤形危險仰賴

聖主福庇得以化險爲平計前後各處斃賊約二百餘

名該逆詭計既無所施非圖他竄卽遠求金陵之賊接應連日探聞下游時有賊船數隻或數十隻乘風駛上而援兵尙未併集萬一賊匪他竄我兵無船不能急追蔓延尤爲可慮應請

飭催大營所派雲南官兵及湖南所派鎮筸鎮兵星速前來赴援並令迎賊夾攻以期迅速殲除奏上命軍機大臣傳諭張芾曰逆匪圍撲南昌連次用地

雷轟陷城牆經該省文武合力堵禦俾得化險爲平
所有轟陷城垣業已修復在事各員均屬奮勉可嘉
著張芾擇其尤爲出力者隨時保奏向榮張亮基等
所派官兵已降旨催令速赴江西救援俟兵力旣集
卽可內外夾攻殲除醜類

上又命軍機大臣傳諭向榮張亮基駱秉章曰江西省
城被圍日久而逆燄方張援兵不至勢甚可危向榮

前派總兵音德布帶兵一千二百名馳往援剿鎮筵
鎮標官兵亦經該督撫派員帶赴江西現在該省情
形緊急著該大臣等迅卽飛催帶兵各員星夜馳往
合力會剿以解南昌之圍又據張芾奏沿江尙有匪
船或數隻或數十隻駛往上游恐爲江西接應著向
榮派撥兵船沿途截剿勿使連檣西上

十二日
乙卯陸應穀奏言查豫省自上年冬月辦

理防堵以來先後請餉連部撥留用各款統計
僅一百二十餘萬陸續支應防兵製備軍火器
械並解江南糧臺及本省軍需極力撙節計已
支用八月之久現在訥爾經額督師前赴河北
征勦河南設立糧臺供應陝甘督臣舒興阿山
東撫臣李德等所帶官兵均令由豫支應餉項
短絀殊難籌辦合無仰懇

天恩飭部就近籌撥餉銀二三十萬兩徑解徐州糧臺
俾濟要需奏入

上諭曰戶部速行妥議江南河北各糧臺應行接濟之
處著酌量緩急籌辦旋經戶部議覆擬撥陝西兩浙
等省銀共四十萬兩

上從之

同日

上諭內閣曰新調江蘇布政使陳啟邁著馳驛前赴新任所有該員承辦糧臺事務著新授廣東高廉道法良接辦俟軍務告竣再赴新任

十三日 丙辰 訥爾經額托明阿奏言本月初九日

接據懷慶府城內專丁密稟來營告急當卽商之內閣學士勝保揀派兵勇隨同來差乘夜仍由僻路繞至城下繫入密示該府縣選派守城

壯勇二三百名準備於七月初三日接仗乘隙
縋城從後夾擊並約定勝保攻打南面臣托明
阿提督善祿攻打東面復知會山東巡撫臣李
德總兵董占元進攻北面是日督兵前進該逆
但於木壘內暗放大礮並不迎敵我兵奮不顧
身直前進攻至中間木壘之下一齊拋放火毬
火箭該逆卽由木壘齊出勢甚兇悍臣托明阿

與善祿督令官兵擊斃該匪三百餘名賊始敗
退復有賊匪欲抄我後經沿隄伏兵迎擊斃賊
甚多其南路經勝保親督兵勇斃賊千餘名查
東南一帶及沁河迤北均紮有營盤防範自可
無虞惟府城迤西較爲空虛隨商定將勝保帶
來之副都統雙成所領馬隊兵五百名並善祿
所帶兵內分撥六百五十名一併交雙成統帶

繞道前往府西擇要安營以便夾攻並扼其接
濟糧道臣訥爾經額復令運司楊需於屯駐輝
縣兵內撥出五百名會同署副將伊農阿帶領
馳赴尙書恩華行營協同進剿以期迅解城圍
奏入報

同日勝保奏言初六日臣等會督將士進攻托

明阿仍攻東北善祿攻正東臣勝保攻正南直
撲南門土壘逆匪分股抵拒其東北正東二股
經臣托明阿善祿等督率官兵擊斃二百餘名
賊匪敗退俱繞賊營礮臺奔入土壘其南股賊
匪頗衆臣勝保督率將士揮兵迎敵擊斃多名
我兵已追近城濠該逆復由東北擁衆而出直
奔陣前我兵俟其撲入卽奮勇迎勦該逆不能

抵禦仍復敗竄統計殺賊八九百名其搖旗領隊者皆髮長尺許的係老賊均被殺死若兵力厚集各路俱能認真進剿無難迅殄逆氛

勝保又奏言臣咨調防守柳園口天津兵三百名來懷以資攻剿適接准訥爾經額咨現派副都統松玉總兵德坤前任河督文冲管帶兵勇共三千名前來隨同會剿但由武涉渡河前來

則可有濟於事若往丹河以北則於解圍一層
仍屬隔膜此時但有得力兵勇爲後路策應由
外攻入使賊匪立潰可期殄滅奏入

上命軍機大臣傳諭訥爾經額恩華托明阿勝保曰懷
慶賊匪經勝保會同托明阿善祿分路進攻先後殺
賊八九百名領隊髮賊均被殺死節次勦殺已四五
千名現在所餘賊匪不過數千若各路俱能認真合

剿何難迅就殄滅疊經降旨令訥爾經額咨令統兵大臣分路夾攻昨以恩華董占元等紮營均在丹沁兩河之北距賊太遠特諭令拔營前進逼近賊巢方能聲勢聯絡其柳園口防河之天津兵三百名已由勝保札調赴營著訥爾經額仍遵前旨迅卽飭令松玉德坤帶兵馳赴勝保軍營並令由武陟渡河較爲迅速不可赴丹河以北致延時日恩華托明阿勝保

等軍營均與訥爾經額相距尙遠若必待往返咨報
聯銜具奏轉恐稽延時日嗣後何人接仗卽由何人
奏報如會同進兵卽聯銜具奏

同日張芾奏言六月二十四日江西城外賊匪
數千人突自得勝門外賊營出向東南直撲永
和門外總兵馬濟美營盤馬濟美帶兵堵禦正
在乘勝窮追不意樹林內埋伏多賊突出抗拒

我兵少卻該總兵奮力督戰手刃數賊因衆寡
不敵身受矛傷登時陣亡臣卽飭遊擊祥麟點
放二千斤大礮正中賊隊城外營內亦開礮接
應先後擊斃賊匪無數適知縣沈衍慶同從九
品胡椿陳炳龍管帶練勇由南面出隊施放連
環槍礮斃賊多名千總王樹英等帶勇前來會
同奮擊參將羅玉斌復督帶川勇貴勇署參將

文忠帶九江鎮兵分三路夾擊總兵阿隆阿統
帶鎮標各兵自進賢門前來策應該逆紛紛敗
退復飭知府耆齡派外委哈玉麟等出隊邀截
斃賊頗多查總兵馬濟美奮勇捐軀其祖與父
皆係效死疆場可謂世篤忠貞應請

天恩優卹以慰忠魂所遺九江鎮總兵員缺卽委南頓
鎮總兵阿隆阿暫行兼署臣察看賊勢較上次

打仗人數增至三倍之多我軍究形單薄不敷
調遣應請

飭下湖南廣東各督撫迅撥精兵各二千名來江助剿

奏入

上命軍機大臣傳諭張芾陳孚恩江忠源曰逆賊圍攻
南昌我兵防守甚嚴復有馬濟美戴文蘭兩軍分扼
東西兩面該匪前無可乘旁有牽制鋌而走險爲此

撲營之舉其意實圖擾我營盤進占地勢現在馬濟
美陣亡所帶官兵必須統領得人阿隆阿雖兼署鎮
篆其進賢永和兩門營盤能否兼顧亟須妥籌布置
廣東援兵到尙需時未可株待音德布此時想已帶
兵趕到湖南兵勇已於六月十八等日先後起程計
亦陸續可抵南昌該撫仍當會同陳孚恩江忠源妥
爲調度以戰爲守此次轉敗爲勝該撫等均能親身

督戰其帶勇各員分門出隊亦皆踴躍效命果能始終不懈逆匪必可殲除該撫務當激勵士氣相機進兵不可因小有挫折致形畏阻江面賊船續至後路旣無追兵湖口又無重鎮惟附近河干設法堵禦近城居民若能自相團練如金陵之四十八社揚州之虹橋皆可補助官兵之力

上又命軍機大臣傳諭葉名琛柏貴曰逆賊分股竄撲

江西省城爲時已久疊次用地雷轟塌城身均經張
芾與陳孚恩江忠源等督令兵勇隨時搶護修築官
軍亦疊有斬擒惟自六月二十三四日以來逆衆蠶
擁蟻集直撲城外官兵營盤九江鎮總兵馬濟美追
賊遇伏陣亡且沿江匪船或數隻或數十隻紛紛駛
往上游亦難保非前往該處接應若勦辦再稽時日
南昌甚屬可危昨調湖南兵勇亦尙未能趕到現在

待援甚急著葉名琛柏貴迅卽在韶州等鎮內就近
挑選精兵二千名遴委得力員弁星夜管帶前往以
資攻剿再前調赴江南剿賊之紅單船隻現尙未抵
江口並著飛催沿海各地方官飭令迅駛前進

上又命軍機大臣傳諭張亮基駱秉章曾國藩曰本日
據張芾奏稱逆匪於六月二十四日率衆數千突由
得勝門外向東南直撲永和門外官兵營盤雖經兵

勇邀擊轉敗爲勝連日續到賊船甚多我兵十分單
弱急待援兵早到湖南距該省一水直達前調之鎮
箠等鎮官兵並所募湘鄉等縣練勇著張亮基駱秉
章曾國藩迅卽飭催管帶各員星夜馳赴南昌會合
剿賊

上諭內閣曰九江鎮總兵世襲騎都尉馬濟美忠貞後
裔疊著戰功此次身先士卒乘勝窮追遇伏陣亡殊

堪憫惻馬濟美著照總兵陣亡例從優賜卹任內處
分悉予開復應得卹典該衙門察例具奏以慰忠魂
同日戶部尙書孫瑞珍奏言查賊匪竄入河南
意在北渡而我兵堵剿之策莫重於扼守黃河
撤收船隻但將沿河一帶緊要渡口處處扼定
南北岸船隻悉數撤收去其桅柁或牽置岸上
或鑿沈水中該逆無船可得非但南中之賊不

能北渡卽現在竄擾懷慶一帶之匪亦不獲南
歸南北不通勦辦更易因思河南山東江蘇山
陝等省均有沿河州縣該州縣文武員弁於本
處渡口之要隘船隻之多寡耳目旣近訪察不
難若以撤收船隻之事專委沿河州縣文武各
就本境趕緊妥辦則力以專而易就功以分而
易成再派誠實員弁帶領兵丁看守則益昭嚴

密矣

孫瑞珍又奏言辰下豐北復報缺口河流旁瀉其豐北以上河由故道應令將撤收船隻之事一律照辦惟豐北以下清江浦以上數百里河身既無黃水又無清水來往行人與行陸路無異南中賊匪若由此路竄入河北殊爲可慮至微山等湖爲黃流所頂托汪洋浩瀚與邇河連

爲一片相應請

旨嚴飭兩江東南兩河總督江蘇山東巡撫督飭各該
管州縣相度地勢將如何撤收船隻如何堵截
要隘之處趕緊籌辦奏入

上命軍機大臣傳諭直隸東河南河江蘇河南山東山
西陝西各督撫曰黃河爲南北天險扼守要隘必應
撤收船隻扼定緊要渡口著直隸東河南河江蘇河

南山東山西陝西各督撫迅飭沿河各地方文武並
河道廳弁各就本境不拘何項船隻悉數撤收不特
清江孟津蘭儀等處渡口最關緊要卽偏僻港汊亦
當嚴防偷越該督撫等仍遴委妥員沿河往來察看
遇有玩泄員弁卽嚴叅懲辦斷不可任賊匪再有搶
船偷渡之事至豐北既有漫口微山昭陽等湖爲黃
流所頂托與運河連爲一片防守更屬非易並著各

督撫飭屬相度地勢設法堵截前次北竄之匪係搶奪煤船渡河雖經官兵疊次焚燬未能淨盡其船現泊何處是否曾爲賊踞著長臻陸應穀迅飭查明焚燬杜賊奔竄之路

十四日丁巳舒興阿奏言據總兵郝光甲稟稱該

鎮統帶官兵過河卽日分起前進已距澤州不遠該處與懷慶僅隔太行一山臣卽飛飭郝光

甲行抵懷慶後隨同將軍托明阿等合力會剿
復淮河南撫臣陸應穀來函亦以河北之賊恐
由孟縣渡河南竄臣當派副將珠克登等前往
合力截剿奏八

上命軍機大臣傳諭舒興阿曰現在河南賊匪已經陸
應穀督率鎮將將大股殲滅總兵郝光甲已會同山
西將弁由澤州出山迎剿著該督飭令該鎮速赴懷

慶聽候調遣若河北情形較河南緊急該督仍當渡河會剿昨有旨諭令沿河各督撫督率文武認真稽查口岸該督已派副將珠克登帶兵馳往孟津渡口駐紮自應如此辦理惟緊要渡口旣經設防其偏僻處所港汊紛歧尤須嚴防偷渡著舒興阿卽就近督飭巡河各員無論何項船隻悉數撤收以杜該匪奔竄之路

十五日戊午琦善陳金綬雷以誠福濟奏言初四

日辰刻賊由鈔關門南之贏子巷擁出數百人
適千總李光覲在彼設伏卽帶領兵勇迎擊殲
斃多名初六日午刻天甯門撲出賊匪數百名
都司常萬清等帶兵截擊用銅礮轟斃十餘名
復於草間設伏擊斃多賊餘匪遁入城內初八
日黎明瓜州賊船大小數百隻上竄至三汊河

總兵出騰龍整隊迎擊一面知會侍衛德興阿
帶領馬隊於西岸嚴陣以待並派都司滿祿帶
河州官兵三百餘名隨同德興阿屯紮西岸防
賊抄襲旋見賊衆四千餘名由運河東岸鼓噪
而前直撲三汊河口山東官兵營盤瞿騰龍督
率遊擊安勇黃志配葉榮都司毛三元守備馬
連科帶領直隸山東官兵六百名過河迎擊殺

賊無數又見另股賊匪二三千人在下游揚子
橋支搭浮橋渡河欲撲南門大路我兵隔河用
銅礮擡礮連環轟擊賊匪浮橋難以支搭又竄
至上游搭橋由桂花莊直撲鈔關門以西繞赴
南門東岸期與南門賊匪聯絡瞿騰龍帶領官
兵又趕赴上游支搭浮橋前往迎擊一面飛調
遊擊李英魁率都司余兆青等渡河合力迎截

賊衆死拒不退經李英魁余兆青從旁衝擊瞿騰龍亦率兵迎面進勦賊陣始亂紛紛潰竄別遣兵舁水繞由儀徵河之西岸兩面夾擊賊勢不支仍悉數竄回瓜州現在城中賊勢漸窮望援甚急疊據儀徵縣探報江甯連日復有賊船數十隻及百餘隻陸續放至瓜州希圖接應福濟又奏言連日察看賊情窮蹙瓜州接應之

路又經三汊河官兵擊敗城中糧食將盡該逆
屢在鈔關等門偷搭浮橋似有竄逸之勢初七
日據參將師長鑣稟稱本日寅刻派把總楊成
章等帶領兵勇二百名在徐凝門外埋伏黎明
賊由浮橋過河約二百餘名蠶擁前來我兵突
出圍攻擊斃賊匪四五十名生擒旅帥毛老四
一名賊匪因失旅帥卽在城上吹螺復哨聚四

五百名出城我兵奮勇爭先適雷以誠鄉勇亦到擊斃過橋之匪及落水者又一百七八十名奏八

上命軍機大臣傳諭琦善陳金綬雷以誠福濟曰揚州賊匪屢被我兵圍剿大受懲創訊據賊供欲分門竄出連日復有賊船數十隻及百餘隻陸續放至瓜州難保不爲城中救援該大臣等務當督飭將弁兵勇

趁城賊勢孤剋期收復仍嚴防各路賊匪救援攻剿更易得手

上又命軍機大臣傳諭周天爵奕經李嘉端呂賢基曰
本日據琦善等奏揚城賊匪勢已窮蹙訊據賊供有
欲分門竄出之語揚州密邇皖省防堵最關緊要周
天爵與奕經各帶官兵在宿徐一帶扼要布置勿任
竄擾呂賢基督同趙昀等辦理本省團練諒已漸有

成效卽飭諭各處鄉勇併力剿賊以爲官兵策應
同日兵科給事中吳廷溥奏言揚州指日克復
賊匪必勢窮思竄現豐北漫口山東一帶飢民
須防勾結懷慶城外督兵諸臣不少可否請

旨飭諭撫臣李德帶兵迅回山東在清江之北曹州以
南擇要駐紮以防逆賊奔竄山東爲畿輔屏障
山東無虞則直隸不至驚擾卽河南攻剿賊匪

亦易得手至山西素稱殷富賊匪攻圍懷慶意在窺伺山西必須扼險嚴防直隸督臣訥爾經額現已出境迎勦擬並請

旨飭下尙書桂良於河南直隸交界處所不時派員巡查勸諭民間自行團練以資捍衛奏入

上命軍機大臣傳諭訥爾經額桂良曰現在懷慶賊匪疊被官兵圍勦勢窮思竄直隸接壤河南亟宜嚴密

防範至揚州勦辦亦經屢獲勝仗指日即可殲除但
恐餘匪乘閒北竄直隸與山東毗連地方不可不認
眞籌防著訥爾經額桂良嚴飭地方官於豫東兩省
交界處所實力巡查盤詰奸細毋任闖入其山西太
行山各隘口並著訥爾經額飭令將弁兵勇嚴行堵
截絕賊奔竄之路